

Dómsorð:

Stefndu, Kristján Teitsson og Hagtrygging h/f, bera in solidum skaðabótaábyrgð að $\frac{1}{3}$ hluta á því tjóni, sem eigandi bifreiðarinnar X 1201 varð fyrir í umræddum árekstri.

Málskostnaður fellur niður.

Föstudaginn 2. maí 1969.

Nr. 72/1969. **Fjármálaráðherra f. h. ríkissjóðs**
 gegn
Bandalagi starfsmanna ríkis og bæja.

Dómenndur:

hæstaréttardómararnir Einar Arnalds, Gizur Bergsteinsson og
 Logi Einarsson og prófessorarnir Ármann Snævarr og Theodór
 B. Línal.

Kærumál. Frávísun máls frá Félagsdómi synjað.

Dómur Hæstaréttar.

Með kæru 8. apríl 1969, er hingað barst 15. s. m., hefur sóknaraðili kært til Hæstaréttar samkvæmt 67. gr. laga nr. 80/1938 úrskurð Félagsdóms, uppkveðinn 2. apríl 1969, í máli varnaraðilja gegn sóknaraðilja. Krefst sóknaraðili þess, að hinn kærði úrskurður verði úr gildi felldur og málinu vísað frá Félagsdómi. Þá krefst hann og málskostnaðar fyrir Félagsdómi og kærumálskostnaðar úr hendi varnaraðilja.

Varnaraðili krefst staðfestingar hins kærða úrskurðar og kærumálskostnaðar úr hendi sóknaraðilja.

Með skírskotun til forsendna hins kærða úrskurðar ber að staðfesta hann.

Sóknaraðili greiði varnaraðilja kærumálskostnað, kr. 5.000.00.

Dómsorð:

Hinn kærði úrskurður á að vera óraskaður.

Sóknaraðili, fjármálaráðherra f. d. ríkissjóðs, greiði

varnaraðilja, Bandalagi starfsmanna ríkis og bæja, kæru-
málskostnað, kr. 5.000.00.

Úrskurður Félagsdóms 2. apríl 1969.

Dómendur:

Hákon Guðmundsson,
Bjarni K. Bjarnason,
Ragnar Jónsson,
Bjarni Sigurðsson og
Einar B. Guðmundsson.

Mál þetta er höfðað fyrir Félagsdómi af Bandalagi starfsmanna ríkis og bæja gegn fjármálaráðherra f. h. ríkissjóðs með stefnu, útgefinni 5. f. m.

Dómkröfur stefnanda eru þessar:

1. Að dæmt verði, að ákvörðun stefnda frá 27. febrúar þ. á., þess efnis, að laun ríkisstarfsmanna, gjaldkræf í marzbyrjun 1969, yrðu greidd með þeirri verðlagsuppbót, er gilti fyrir febrúarmánuð 1969, hafi verið ólögleg, eins og á stóð.
2. Að stefndi verði dæmdur til að greiða verðlagsuppbót á laun ríkisstarfsmanna fyrir marzmánuð 1969 miðað við vísitölu 1. febrúar 1969.
3. Að stefndi verði dæmdur til að greiða stefnanda málskostnað að mati dómsins.

Stefndi hefur krafizt þess aðallega, að máli þessu verði vísað frá dómi, en til vara, að hann verði algerlega sýknaður af kröfum stefnanda.

Þá krefst hann og málskostnaðar úr hendi stefnanda að mati dómsins.

Frávísunarkrafa stefnda hefur samkvæmt 2. mgr. 108. gr. laga nr. 85/1936, sbr. 69. gr. laga nr. 80/1938, verið tekin til meðferðar sérstaklega, og var munnlegur málflutningur um hana 28. f. m.

Málavextir eru þessir:

Með dómi Kjaradóms 21. júní 1968 var ákveðið, að ríkisstarfsmenn þeir, sem nefndur dómur tekur til, skyldu fá verðlagsuppbót, og kveður 2. gr. dómsins nánar á um það, á hvaða laun verðlagsuppbót skuli greidd. Í 4. gr. dómsins segir, að Kauplagsnefnd skuli hinn 1. maí, 1. ágúst og 1. nóvember 1968 og 1. febrúar 1969 reikna þá hækkun, sem hlutfallslega hafi orðið á framfærslukostnaði í Reykjavík frá 1. nóvember 1967.

Þá geymir nefnd 4. gr. enn fremur svohljóðandi ákvæði:

„Frá vísitölunni, eins og hún er hverju sinni samkvæmt þessum útreikningi nefndarinnar, dregur hún 2.34 prósentustig, og fæst þá hundraðshluti þeirrar verðlagsuppbótar, er greidd skal á laun frá 1. degi næsta mánaðar á eftir, í samræmi við ákvæði 2. gr. Verðlagsuppbótin reiknast með tveimur aukastöfum“.

Í 6. gr. dómsins segir, að hann gildi frá 1. apríl 1968 og til sama tíma og dómur Kjaradóms frá 30. nóvember 1967, eða til 31. desember 1969.

Hinn 14. febrúar s.l. hafði Kauplagsnefnd eigi enn birt, hver verðlagsuppbótin yrði fyrir tímabilið 1. marz til 31. maí 1969. Þann dag fór stefndi þess á leit við stefnanda, að teknir yrðu upp samningar um endurskoðun dóms Kjaradóms frá 21. júní 1968 á grundvelli ákvæða 2. mgr. 7. gr. laga nr. 55/1962 um kjarasamninga opinberra starfsmanna. Stefnandi hafnaði þeim til-mælum stefnda 17. febrúar s.l. með þeim rökum, að lagaheimild skorti þá til viðræðna á grundvelli nefnds ákvæðis laga nr. 55/1962. Hinn 24. febrúar s.l. áréttaði stefndi bréflega áðurgreind tilmæli sín um endurskoðun dóms Kjaradóms frá 21. júní 1968. Vitnar stefndi þar, svo sem segir í bréfinu, „til þeirrar grund-vallarreglu laga nr. 55/1962 um kjarasamninga opinberra starfs-manna, að kjör þeirra skuli ráðast af kjörum launþega, sem vinna sambærileg störf hjá öðrum en ríki og sveitarfélögum, sbr. 20. gr. laganna“.

Enn segir svo í bréfi stefnda:

„Ráðuneytið vitnar einnig til þess, að samningum þeim á almennum vinnumarkaði, sem voru forsenda og viðmiðun í niður-stöðu Kjaradóms frá 21. júní 1968, hefur nú öllum verið sagt upp, og falla þeir úr gildi frá og með 1. marz n. k.“. Í bréfi þessu tekur stefndi upp ýmsar fleiri ástæður fyrir þeirri kröfu sinni, að fullnægt sé skilyrðum 1. másl. 2. mgr. 7. gr. laga nr. 55/1962 til endurskoðunar kjarasamninga án uppsagnar, og telur að auki „brostnar forsendur fyrir framkvæmd gildandi kjaradóms, að því er varðar verðlagsuppbætur“.

Loks fer stefndi í oftnefndu bréfi þess á leit við stefnanda, að hann samþykki, að greiðsla verðlagsuppbótar verði frá og með 1. marz s.l. hin sama og var 1. febrúar, þar til fengin sé endanleg niðurstaða um verðlagsuppbótina.

Stefnandi svaraði þessu bréfi stefnda 25. s. m., og segir þar m. a., að bandalagsstjórnin ítreki þá afstöðu sína, að lagaheimild skorti til endurskoðunar Kjaradóms, þar sem engar kaupbreyt-ingar hafi orðið á almennum vinnumarkaði, og geti hún því eigi

gengið til samningsviðræðna um endurskoðun og þá ekki heldur fallizt á að semja um frávík frá greiðslu verðlagsuppbótar 1. marz, sem sé ótvírætt ákveðin í 4. gr. dóms Kjaradóms frá 21. júní 1968.

Hinn 27. febrúar s.l. ritar stefndi enn bréf til stefnanda. Í því segir m. a. svo:

„Sá ágreiningur, sem nú er risinn milli fjármálaráðuneytisins og BSRB, snýst um tvö atriði.

1. Hvort skilyrðum 2. mgr. 7. gr. laga nr. 55/1962 til endurskoðunar dóms Kjaradóms án uppsagnar né fullnægt.
2. Hvort heimilt sé að greiða verðlagsuppbót febrúarmánaðar á marzlaun þrátt fyrir ákvæði dóms Kjaradóms frá 21. júní 1968“.

Um fyrra atriðið segir stefndi, að því máli hafi þann dag verið vísað til sáttasemjara ríkisins og verði það látið ganga áfram til Kjaradóms, telji sáttasemjari viðræður tilgangslausar.

Að því er síðara atriðið varðar, ítrekar stefndi skoðun þá, er hann setti fram í áður nefndu bréfi sínu 24. febrúar s.l., að það sé grundvallarstefna í lögum um kjarasamninga ríkisstarfsmanna, að kjör þeirra skuli vera sambærileg við aðrar stéttir, og að greiðsla verðlagsuppbótar á laun samkvæmt beinum ákvæðum dóms Kjaradóms mundi því veita opinberum starfsmönnum kjaraþætur, sem engir launþegar í landinu nytu að svo stöddu án nýrra samninga. Bryti því framkvæmd ákvæða kjaradómsins að þessu í bága við grundvallarstefnu laga um kjarasamninga opinberra starfsmanna. Þá heldur stefndi því og fram í nefndu bréfi, að honum sé ekki skylt að greiða verðlagsuppbót á laun ríkisstarfsmanna fyrirfram. Lýsir hann því yfir í lok bréfsins, að með skírskotun til þess, sem að framan sé rakið, verði laun, gjaldkræf í byrjun marzmánaðar, greidd með þeirri verðlagsuppbót, sem gildi fyrir febrúar.

Gaf stefndi út almenna fréttatilkynningu hinn 27. febrúar s.l., þar sem þessari afstöðu hans er lýst.

Á fundi stjórnar stefnanda hinn 1. marz var samþykkt með öllum atkvæðum ályktun þess efnis, að mótmælt væri „laga og samningsbrotum, sem átt hafa sér stað með niðurfellingu á hækkun verðlagsbóta til opinberra starfsmanna 1. marz, þvert ofan í skýr ákvæði í dómi Kjaradóms 21. júní 1968 um, að verðlagsuppbót skuli reikna út í febrúarmánuði og greiða 1. marz“. Þá segir enn fremur svo í ályktun þessari:

„Lögum samkvæmt ber að framkvæma ákvæði þessa dóms (þ.

e. Kjaradóms) þangað til nýr samningur hefur verið gerður eða nýr kjaradómsúrskurður liggur fyrir“.

Þar sem samkomulag náðist eigi um það, hverja verðlagsuppbót skyldi greiða hinn 1. marz s.l., gekk málið til sáttasemjara og sáttanefndar, sem skipuð var sérstaklega, og vísaði hún málinu að lokinni árangurslausri sáttatilraun til Kjaradóms hinn 4. marz samkvæmt 3. mgr. 14. gr., sbr. 2. mgr. 7. gr. laga nr. 55/1962. Hefur Kjaradómur nú tekið málið til meðferðar.

Stefndi styður kröfu sína um frávísun þeim rökum, að höfuð-ágreiningsefni máls þessa sé, hvort fullnægt sé skilyrðum 2. mgr. 7. gr. laga nr. 55/1962 til endurskoðunar og breytinga miðað við 1. marz 1969 á ákvæðum dóms Kjaradóms frá 21. júní 1968 um greiðslu verðlagsuppbótar á laun ríkisstarfsmanna. Hér sé því um kjaraágreining að ræða. Úr þessum ágreiningi eigi Kjaradómur að skera, en ekki Félagsdómur. Hafi ágreiningi þessum þegar verið skotið til Kjaradóms. Fyrr en sá dómur hafi kveðið upp úrskurð sinn, viti enginn, hvaða verðlagsuppbót beri að greiða ríkisstarfsmönnum frá og með 1. marz s.l. Geti því vísitöluuppbót, sem ekki sé enn búin að ákveða, eigi verið gjaldkræf. Í afstöðu stefnda til þessa ágreiningsatriðis málsaðilja felist eigi heldur það, að skyldu til greiðslu marzverðlagsuppbótar sé hafnað af hans hálfu, heldur einungis, að ákvörðun um greiðslu bíði úrslita Kjaradóms. Þá sé hvorki í dómi Kjaradóms né kjarasamningalögunum kveðið á um það, hvenær starfslaun skuli greidd, og eigi það jafnt við um launin sjálf og verðlagsuppbætur. Ágreiningur um þetta efni varði því hvorki skilning á dómi Kjaradóms né kjarasamningalögunum og falli því ekki undir Félagsdóm til úrskurðar. Beri því af þessum ástæðum öllum að vísa báðum dómkröfum stefnanda, eins og þeim sé háttað, frá Félagsdómi.

Stefnandi hefur eindregið mótmælt frávísunarkröfu stefnda og krafist þess, að henni verði hrundið. Er afstaða hans til málsins sú, að stefndi hafi með því að greiða ekki þeim ríkisstarfsmönnum, sem dómur Kjaradóms frá 21. júní 1968 tekur til, verðlagsuppbót bæði gerzt brotlegur við almenn ákvæði laga nr. 55/1962 og jafnframt gengið gegn beinum skyldum sínum samkvæmt ákvæðum nefnds dóms. Stefnda hafi borið að fylgja ákvæðum oftnefnds dóms frá 21. júní 1968, þar til Kjaradómur hafi ákveðið annað, og skipti það eigi máli í þessu sambandi, þótt því hafi verið skotið til úrskurðar Kjaradóms, hvort efnisástæður séu fyrir hendi til breytinga á ákvæðum framangreinds dóms Kjaradóms. Hér sé þannig um að ræða ágreining um skyldur

stefnda samkvæmt lögum nr. 55/1962 og dómi Kjaradóms frá 21. júní 1968, en um þann ágreining eigi Félagsdómur úrskurðarvald.

Af því, sem að framan er rakið, er ljóst, að aðilja greinir á um skyldur stefnda og réttindi stefnanda samkvæmt oftnefndum dómi Kjaradóms frá 21. júní 1968 á tímabili því, er kann að líða frá 1. marz s.l. og þar til Kjaradómur hefur afgreitt það kjaramál, sem til hans var skotið 4. marz s.l., en báðar dómkröfur stefnanda lúta að þessu efni. Samkvæmt 1. mgr. 25. gr. laga nr. 55/1962 dæmir Félagsdómur í málum, sem rísa milli samningsaðilja út af brotum á nefndum lögum og ágreiningi um skilning á kjarasamningi og gildi hans, sbr. hér 3. mgr. 21. gr. sömu laga. Skiptir það eigi máli við úrlausn um frávísunarkröfu stefnda, eins og atvikum máls þessa er háttað, þótt skotið hafi verið til Kjaradóms kröfu stefnda um það, að sá dómur tæki til endurskoðunar ákvæði dómsins frá 21. júní 1968 um verðlagsvísitölu á laun starfsmanna ríkisins.

Samkvæmt þessu verður krafa stefnda um vísun máls þessa frá Félagsdómi eigi tekin til greina.

Kveðið verður á um málskostnað við efnisúrlausn í máli þessu.

Ályktunarorð:

Frávísunarkrafa stefnda er eigi tekin til greina.

Sératkvæði

Einars B. Guðmundssonar

Með bréfi fjármálaráðuneytisins 24. febrúar 1969 til Bandalags starfsmanna ríkis og bæja lýsti ráðuneytið því, að það teldi, að fullnægt væri skilyrðum 7. gr. laga nr. 55/1962 til endurskoðunar kjarasamnings við bandalagið án uppsagnar. Beindi ráðuneytið þeirri kröfu til B. S. R. B., að ákvæðin um greiðslu verðlagsuppbótar á laun frá og með 1. marz 1969 yrðu tekin til endurskoðunar. Jafnframt fór ráðuneytið þess á leit, að samningsviðræður um þá kröfu hæfust án tafar.

Þessu bréfi svaraði B. S. R. B. 25. febrúar og taldi sér ekki fært að verða við tilmælum ráðuneytisins.

Hinn 27. febrúar 1969 sendi fjármálaráðuneytið málið til sátta-semjara ríkisins. Fór ráðuneytið þess á leit, að hann tæki málið þegar upp til sáttaumleitana, sbr. 1. mgr. 12. gr. laga nr. 55/1962. Lýkur bréfi ráðuneytisins með þessum orðum:

„Ráðuneytið leggur jafnframt áherzlu á, að málið verði án tafar sent Kjaradómi til meðferðar, ef þér teljið sáttaumleitanir tilgangslausar“.

Hinn 28. febrúar skipaði félagsmálaráðuneytið sérstaka sátta-
nefnd til að fara með mál þetta ásamt fleiri málum.

Sáttatilaunir reyndust árangurslausar, og vísaði því sátta-
nefndin hinn 4. marz 1969 málinu til Kjaradóms samkvæmt 3.
mgr. 14. gr. laga nr. 55/1962.

Þar sem málið þannig sætir meðferð hjá Kjaradómi og Félags-
dómi samtímis, þykir rétt með skírskotun til niðurlagsákvæðis
117. gr. laga nr. 85/1936 að fresta meðferð málsins fyrir Félags-
dómi, þar til það hefur hlotið endanlega afgreiðslu í Kjaradómi.

Ályktunarorð:

Meðferð máls þessa fyrir Félagsdómi er frestað.

Föstudaginn 2. maí 1969.

Nr. 176/1968. **Karl Einarsson**

gegn

Oddgeiri Sveinssyni.

Útivistardómur. Ómaksbætur.

Dómur Hæstaréttar.

Málssókn þessi fellur niður.

Áfrýjandi, Karl Einarsson, er eigi sækir dómþing í máli
þessu, greiði kr. 400.00 útivistargjald til ríkissjóðs, ef hann
vill fá mál sitt tekið fyrir af nýju.

Einnig greiði hann stefnda, Oddgeiri Sveinssyni, sem látið
hefur sækja þing og krafizt ómaksbóta, kr. 3.000.00 í ómaks-
bætur að viðlagðri aðför að lögum.